



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail: tiryimiyim@gmail.com

TAPAK 7

Yangia anidakangma :



Tir Yimiyim



tir_yimiyim



tir yimiyim

TAPAK 8

Onoki US matsüngdang mapudaktsü: Iran Tir Pezeshkian

Cristiano Ronaldo-i otsü tasen ka yangluogo



VOL. XXIII ISSUE NO. 131 (ADOK 131) DIMAPUR TENTONÜ (MONDAY) TSÜKLAI (FEBRUARY) 23, 2026 ₹ 5.00

Nagaland nung PM SHRI schools jenjang majung

Dimapur, February 22, 2026 (TYO): Nagaland nung anogo tashi PM SHRI school tem meyipa reprangshidang kaketshir ajema akümba, transition rates majungba aser academic tsütsü tashimait alibatem ajitetogo.

Ministry of Defence nung Joint Secretary aser Nagaland nung PM SHRI Schools atema Central Nodal Officer (CNO) Dinesh Kumar-i February 20 aser 21 anogotem Nagaland semdanga PM SHRI Schools mapa inyakba asadangogo.

National Education Policy (NEP) 2020 kübok India sorkar alizüng den putepa PM SHRI (PM Schools for Rising India) scheme ajanga model schools kümdaktsütsü nükjijong lir.

Dinesh Kumar-i PM SHRI GHSS Chumoukedima, PM SHRI GHS Naharbari, PM SHRI GHS Thahekhü, aser PM SHRI Kendriya Vidyalaya, Project Sewak, Dimapur semdanga liasü.

Pai kaketshirtem aser tesayurtem den ajurutepa sensaksem dang Prime Minister-i model institutions yanglutsü mangdang ayuba lemsatöp.

Paisa kaketshirtem dang tajungtiba akümtsü aser linük yangerba nung shilem agitsü ayongzük.

School kar nung infrastructure nungdakba ajitet. Iba nung classroom peria alitsüba, laboratories tajung amenoktsü, school auditoriums aser sanitation facilities peria yanglutsüba dena lir. Item tebilemstü ya pai Centre nem osang agütsü dang lemsateptsü ta Dinesh Kumar-i ashi.

February 20 nü Dimapur

Bhupen Borah-i BJP nung denogo

Guwahati, February 22, 2026 (Agencies): Taoba Assam Pradesh Congress Committee (APCC) president Bhupen Borah-i Deobarnü Bharatiya Janata Party (BJP) züngsem kümogo aser State Executive Committee nung züngsem asütsü shimogo.

Guwahati nung BJP state headquarters, Vajpayee Bhawan nung Assam BJP president Dilip Saikia-i iba osang metetdaksü.

Taküm March-April meta züngsem 126 agi akümba Assam Assembly elections agitsü aliba mapang ka Borah-i BJP nung denogo.

Pai February 16, 2026 nü Congress nungi sodi agia liasü aser iba ajanga nübortemi pai kechi lemtet agidir ta repranga ataa liasü.

Congress lenisübai pa indang shidi magizük aser Rahul Gandhi dena tongti lennirtemi pa mesüzüktsü merang ta osang angazük.

Ni Congress nungi sodi

Deputy Commissioner Office nung coordination meeting ka ayonga amen aser idangji district administration ketdangsürtem, DEO, DIET Dimapur Principal, Sub-Divisional Education Officers (SDEOs), EBRC officials, aser PM SHRI schools tekolaktem den Samagra Shiksha Nagaland nungi teshimtet nübotem aden.

Senden nung DEO Dimapur-i PM SHRI scheme nung tongshi 6- Curriculum, Pedagogy and Assessment; Access and Infrastructure; Human Resource and School Leadership; Inclusive Practices and Gender Equity; Management, Monitoring and Governance; aser Beneficiary Satisfaction maparen inyakba osang lemsatöp.

PM SHRI school kar nung Class IX nungi Class X tsüngda kaketshir kanga ajema akümba atema tebilemstü abener ta Kumar-i senden nung ashi.

Paisa PM SHRI GHS Burma Camp, Dimapur nung low pass percentage atema benok aser state ketdangsürtem dang school semdanga kulitem bendentsü aser targeted action plan ka renemstü tetuyuba agütsü.

PM SHRI reju shia centre of excellence akümtsü aser quality education agütsütsü atema school-wise action plans yanglutsüla ta senden nungsa jembitep.

Dinesh Kumar-i tatemsa February 21, 2026 nü Nagaland Chief Secretary Sentiyaner Imchen, IAS den ajurutepa anogo ananü senzüba indang osang den teinyaktsütem lemsatöp.

agibaji tanga party ka nung adentsü tebilemba nung masü ta Borah-i tanü ashi.

"Ni BJP nung adentsü sentong yur Congress nungi sodi magi. Congress nung metokmepertem meyipa reprangshitsü aser itemji koktettsü atema ni sodi agi" ta pai ashi.

Taoba hopta Congress lennir kari par kidangi arua jembidang pa temulung yiru aser iba ajanga pa aser party lenisüba tsüngda tesentaktep tali pilatsüsa aküm ta Borah-isa metetdaksü.

Tanü sentong nung Borah den taoba Congress lennir aika aden. Parnok rongnung Sanju Bora, Rajesh Kumar Joshi, Kangkan Das aser Gagan Chandra Bora nunger dena lir.

Taoba Congress züngsem Sanju Boruah-i BJP nung aden aser pa party media panelist ama shimogo.

Iba sentong nung taoba All Assam Students' Union (AASU) leader Sankor Jyoti Baruah-ia BJP nung aden aser state presidenti pa media panelist ama shimokogo.

Naga kin 13-i Foothills Road atema Mar 31 züngzüktsür

Dimapur, February 22, 2026 (TYO): Dimapur nung amenoka aliba Naga kin 13-i state sorkar dang March 31 tashi nung Foothills Road project atema second-phase work order magütsüra lungkak aittsü metetdaksüogo.

Kin 13-i Chief Minister Neiphiu Rio dangi züluba shidi ka nung sorkari Foothills Road atema mapang talangka nungi nangzuka aruba nenshiogo aser mapang atsulangka magizüktsü ta metetdaksüogo.

Foothills Road ya 2013 nung tenzük aser Mon district kübok Tizit nungi Peren district kübok Khelma tashi kilometer 395.9 lir. Iba lenmang ajanga district 8 nung yimtsüng 200 tema ajanga süir ta parnoki shidi nung shia lir.

Chief minister ketdangsüba

kübok SASCII loan scheme kübok two-lane road indang mezüngbuba two-lane road mapa tembanga arudar. Anungji March 31 matongdang Nagaland PWD (Roads & Bridges)-i phase-II kübok tanünga divisions atema work orders agütsütsü ayongzük ta parnokisa metetdaksü.

PWD (Roads & Bridges) minister-i iba mapatong tamakok ngura pa indang portfolio toktsütsü ta nangzükba yimjak nung sangdongogo. Ajsüaaka December 2025 nung ita 12 tembangakaka Baghty division nung contractor firm ana-M/s JK Constructions aser M/s Chabou & Co ajanga mapa shitak meinyaktet ta kin 13-isa ashi.

February 4, 2026 nü department-i contractor firm ana

dangi show-cause notices yokba sülen minister-i February 7 nü mapatong inyakdak semdang aser March 31 tashi nung renemstü mapang züngzüktsü.

Anungji anüngdaka aliba mapatongtem aser talisa Baghty division nung maparen metembangra "people's project" nung tetsükdaksü tulu ka ajurutsü aser nübortemi temulung malemstü ta kin 13-isa metetdaksü.

Iba mapatong nung department mesüra kija ka tuteta aitsütsü tebilemba mali aser tebilemstü khuretji department aser bangdak lenisüba meyong lir ta parnokisa ashi.

March 31 tashi nung maparen metembangra onoki ozüngi melaba ama lungkak aittsü ta kin 13-isa tekümdangtsü metetdaksüogo.

Trump'er Mar-a-Lago resort nung nisung ka khaset

New Delhi, February 22, 2026 (Agencies): Florida nung prangpong abenba nisung ka US President'er Mar-a-Lago resort telungi ait ta US Secret Service-i Deobarnü metetdaksü.

Trump-i Palm Beach nung aliba resort nung hopta tatemlen amunger saka Honibar aonung iba lendong nung pa aser First Lady Melania Trump na White House, Washington nung liasü.

Tang tashi iba nisung indang maitsü memetdaksü lir saka pa ya arishi küm 20 tetenzüklen

aser North Carolina nungi ta osang angazük.

"Mar-a-Lago nung north gate tsütsü iba nisung ya angu aser pai shotgun aser fuel can ka bener liasü" ta Secret Service-i ashi.

Iba nisung yagi North Carolina toktsür apuso aser len tom nung shotgun ka aben. Prangpong sepbangba box ji pa indang gari nung liasü ta Secret Service spokesman Anthony Guglielmi-i ashi.

Trump'er Mar-a-Lago resort nung north gate tsütsü gari ka tugudang iba nisung ya aittsü

merang. Idangji Secret Service agents-i pa noktangtsü merang aser khaset.

Pa ya Secret Service agents aser Palm Beach County sheriff deputy kati khaset ta Secret Service-isa ashi.

Tesüiba nunga aiben Trump khasettsü merangogo. US election matongdang September 2024 nung Florida golf course President Trump khasettsü merangba Ryan Routh (59) tan ita tetenzüklen taküm piyong tepuokdak ayutsü temerenshi agütsüogo.

Manipur sorkari anogo asemnü MLA Valte mang ayimer

Imphal, February 22, 2026 (Agencies): Manipur sorkari BJP MLA Vungzagin Valte nem tetushi agütsüba sayua Deobar nungi tenzuka anogo asemnü state mourning alitsü osang metetdaksüogo.

Iba mapang Manipur nung sorkar kiojen ajak nung Linük Wako tom nung ayutsü aser official entertainment programmes kecha malitsü.

BJP MLA Valte ya Honibarnü Medanta Hospital, Gurugram nung asü. Chief Minister Yumnam Khemchand Singh-i Honibar nikonngang New Delhi tonga ao aser idak nung jagi Gurugram-i oa asür nem tetushi agüja liasü.

MLA tem aser Delhi nung alir Zomi nunger dena sarasadem sentong ka agia liasü.

Arishi küm 61 tain Valte ya Thanlon constituency nungi MLA ka liasü. May 2023 nung kin o kin tsüngda mepetmesü adoka raradang Imphal kübok Nagamapal area nung nisung telok kati pa amakdang kanga mejungi yirua liasü.

Iba lendong sülen pa Delhi



nung advanced medical treatment atema anir ao aser küm ana jungnüa anepalua arur yaküm April ita Churachandpur nung par kidangi anir aru.

Ajsüaaka, February 7, 2026 nü pa temang kanga mejungi aküm aser iba jagi Chief Minister-i pa Delhi-i anir aotsü atema air ambulance ka anepalutsü.

"Pu Valte na temang jungjunga akümba sülen meyipa arungma. Ni na aru atatsü" ta Chief Minister-i iba mapangji shir senshi.

Valte ya 2012 küm Congress ticket amer mezüng atema Manipur Assembly nung züngsem aküm. Iba sülen 2017 nung pa tanaben BJP candidate

ka ama shimtet aser General Administration and Transport Minister ama inyak. Maneni 2022 Assembly election nunga pai kasa menden nungi takok ngua liasü.

Churachandpur district nung Hmar Inpui, Mizo People's Convention aser Zomi Council dena tongti teloktemi Valte asüba atema temulung raksaba aser May 2023 nung mepetmesü zübotem ano mangatetep aliba nenshia metetdaksüogo.

Asür Valte nem tetushi mapang tajung ka nung coffin rally ka ayonga agitsü. Iba sentong atema anogo ano meshimtet lir saka Churachandpur district nungi nisung aika adentsü imlar.



February 22, 2026 nü Delhi nung "Delhi Behaal Jan Samvad" campaign kübok Delhi Aam Admi Party (AAP) Tir, Saurabh Bharadwaj-i lokti ka den jembidang tangokba noksa nung angur. Delhi nung BJP indang gol pezü aketba sorkar liaka nüburtē maneni timtemer, ta pai aitsü.

Karnataka nung tanurtem anema phone tenokdangba benoktsü

New Delhi, Tsüklai/February 22 (Agencies): Karnataka state sorkari arrshi küm 16 ser tekübok tanurtem anema smart phone tenokdangba benoktsü tebilemba lir.

Mapang telatet makai social media amshitepba aser ibaji ajanga tanurtem melungsentsü menentsüba tebilemstü anema iba tenokdangba benoktsü tebilemba lir.

Chief Minister Siddaramaiah-i, tanurtem anema phone tenokdangba benoktsü atema tang o telemtepdak aser universities campus telung nung phone amshiba nokdangtsü atema sorkar universities nung vice chancellors den-a jembitepdar, ta metetdaksü.

Chief Minister-i, "Tanü asenoki iba tebilemstü atema o lemteper, aser nenok ajak yangi

vice chancellors asü nungji nenok tebilemba-a asüngdang. Tanurtem iba temesepba mozü (social media) lar kümдар. Iba dak alia Australia ama linük aika nung kaketshirtem anema mobile phones nokdangtsü atema jembir. Iba dak sendakba nung ni nenok tebilemba metetner. Onoki iba ya asadangdar," ta metetdaksü.

Chief Minister-i, talisa kaketshirtemi mapang telatet kecha makai social media amshitepba ajanga parnok yimyatsüya balaka melenshir, shisaliok junga mangur aser mental health-a raksatsür, ta metetdaksü.

Ano külen Hokolbarnü state assembly nung jembidang Karnataka nung Electronics & IT/BT Minister Priyank Kharge-ia, tanurtem nem

artificial intelligence aser social media timi amshidaksütsü atema onoki mongintem den jembidar, ta metetdaksü.

Goa nunga sorkari arrshi küm 16 ser tekübok tanurtem nem Instagram, Facebook aser X mamshidaksütsü atema jembidar.

Goa Information Technology Minister, Rohan Khaunte-i, arrshi küm 16 purtem melungsentsü ya ano kanga lanu, aser item tanurtem ya lenla ajak nung renloktsü atema study asütsü mapang ka lir, ajisiaka mapang telatet makai internet amshitepba ajanga timtem aser takoksa aika angur, ta metetdaksü.

Andhra Pradesh nung Education Minister Nara Lokesh-ia state nung tanurtem nem social media mamshidaksütsü atema sorkar tebilemba lir, ta metetdaksü.

AI summit nung longkak aitba atema court kati Congress aitsür

New Delhi, February 22 (Agencies): Delhi nung aliba court kati, Delhi nung Global AI Summit agiba mapang Indian Youth Congress (IYC) nung inyakertemi tola semzüker longkak aitba ajanga India tenüng menüktsüogo, ta aitsü.

Judicial magistrate Ravi-i iba tatalokba nung tai tonglokja pua alir nisung pezüprongla police ket nung anogo pongunü atema agütsüogo.

Tang police-i pua aliba nisung pezüji Bihar nungi Youth Congress national secretary Krishna Hari, Bihar state secretary Kundan Yadav, Uttar Pradesh state Tir Ajay Kumar aser Telangana nungi Narasimha Yadav nunger lir.

Magistrate-i, "Iba ama inyakbaji inyakim shidak benshia longkak aitba anema lir. Ibaji ajanga sentong (AI summit) akhümket raksatsüba dang masü saka bendanger ketdangsertem matsüngdang linük tenüng-a menüktsüogo," ta metetdaksü.

Magistrate-isa, longkak aiterem jagi 'India US Trade Deal Compromised' ta zülua aliba tashishitsü o tola nung zülur sayu, ketdangsertem mapa inyakdang tetsükdaksü agütsü aser security police-a yirutsüogo, ta metetdaksü.

"Bharat Mandapam nung AI Summit 2026 tagidak mapang nung tai tonglokja alirtem jagi ozüng alema iba tesem jagi ai," ta court-i metetdaksü.

Court-isa, tang tai tonglokja pua alirtem den külemi inyaksemertem karbo jener asütsüa akok, digital kuli aser senotsü dak sendakba kulitem raksatsür asütsüa akok, ta metetdaksü.

New Delhi nung AI Impact Summit-2026 tatembangbuba sentong nung Indian Youth Congress nung inyakertemi Ato kilonser Narendra Modi aser US Tir Donald Trump na noksa ajenloka aliba tola amer manglong longkak aita sorkar aser India-US shishilembaba tezüngzüktep anema yimyim ayim aser security sepaitem den-a raratepa liasü.

Iba tatalokba dak sendakba nung Hokolbarnü Police-i nisung pezü apu.



February 22, 2026 nü New Delhi nung BJP lenirtemi 131buba 'Mann Ki Baat' sentong reprangdang tangokba noksa nung angur.

Kerala nung final electoral roll sangdongogo; voters crore 2.69 lir

New Delhi, February 22 (Agencies): Kobi melii Kerala nung assembly election agitsü lia Honibarnü Election Commission-i final electoral roll sangdongogo.

Assembly menden 140 aliba state nung final voters list nung voters 2,69,53,644 lir. SIR inyakim kübok final list nung tenüng 8,97,211 züngdokogo.

Kerala nung special intensive revision (SIR) exercise ya yaküm November 4 nungi tenzüka taküm January 30 tashi agia liasü.

Kerala nung chief electoral officer, Rathan U. Khelkar-i, state nung voters 2,69,53,644 nungjagi tebur voters crore 1.31 aser tetsür voters crore 1.38 lir, ta metetdaksü.

Electoral roll final list nungjisa third-gender voters 227 lir aser voters lakh 4.24 bo arrshi küm 18-19 tsüngdapurtem lir.

Yaküm December 23 nü local body election agidang draft rolls sangdongba mapang voters

2,54,42,352 liasü saka tashishiba agütsüba sülen ano tenüng 53,229 züngdok.

Ajisiaka final list nung voters tasepur 15,11,292-a züngoka liasü.

Final roll ji electoral registration officers aser assistant electoral registration officers indang office nung sangdonga liasü.

Final list ji CEO indang website www.ceo.kerala.government.in nunga angutsü.

Tang mezüng voters (küm 18-19 lanurtem) nem EPIC cards magütsü aser tangaleni oa alir voters aser temetongshitsü atema tenüng agüja alirtem nem booth-level officers-i EPICs agütsütsü, ta election ketdangsertemi metetdaksü.

Voters list nung tenüng züngoktsü atema assembly election atema nomination file asüba tatembangbuba anogo tashi nung tenüng agütsütsü akok.

Karnataka nung BJP MLA kati sübokrem tagidak mapang apu



Karnataka nung Shirahatti Assembly constituency nungi BJP MLA, Chandru Lamani aser pa den yariteper ana- Manjunath Valmiki aser Gurunaik nunger noksa nung angur.

Bengaluru, February 22 (Agencies): Karnataka nung Shirahatti Assembly constituency nungi BJP MLA, Chandru Lamani-i sen lakh 5 sübokrem tagidak mapang Karnataka Lokayukta-i puogo; pai sübokremji sen lakh 11 meshia liasü.

Lokayukta-i asalentong yanglur Lamani-i sübokrem tagidak mapang nung pa pua asüngdangya aser pua yuogo. Pa den yariteper anata iba ken o dak sendakba nung puogo.

Lokayukta ketdangsertemi ashiba agi, Gadag district nung irrigation department project ka kübok contract atema pai contractor ka dang sübokremji meshia liasü.

Gadag district nung Class 1 contractor, Vijay Pujar dang sübokrem sen lakh 11 agüjang ta akhangba sülen pai Lokayukta ajurua tashishiba

ken o agüja liasü. Iba nungji ajemdaker Honibarnü Lokayukta police-i sang yutsüba nung MLA Lamani ashi. Lamani-i sen lakh 5 meshizükdang Lokayukta police-i pa apu.

MLA Lamani dak alia pa den külemi inyaksemer ana - Manjunath Valmiki aser Gurunaik nata kasa tesem nungji apu aser asüngdangyatsü atema anir ao.

Tang par asemprongla dang asüngdangyadar aser bushisüngdang tenzükogo.

Prevention of Corruption Act kübok ken o ka benokogo.

Lokayukta ketdangsertemi, iba ken o nung tai tonglokja alir tongti puogo, anungji maneni iba ken o nung shilem agia alir tangartema aputsü atema bushisüngdangtsü aser parnok anema ken o akatsü, ta metetdaksü.



TIR YIMYIM YIMOBILEM (EDITRIAL)

DIMAPUR MONDAY, FEBRUARY (TSÜKLAI) 23, 2026

Tanurtem asoshi bilemstsüla

A tangji, alima nung nisung ajak tain kümerbo asütsü, anungji taintemi inyakba ajak ya tanurtem asoshi inyaktsür. Tanurtem tetezü asen kibong nung asoba chirnurtem kija indang ashirba masü saka alima nung aliba tanurtem ajak indang ashir, kechiyong tarutsü anogotemji parnok ajak meyong lir. Aji oda, tanü asenoki tarutsü indang kanga shisabolua jembiba onük kaji, asen tetsü oshi asenoki sapua mejembiba ajanga samatsü aliba tensa tia ka nung aliba indang ya asütsü. Alima nung tang tashi nung pei kini pei tetsü oshi mejembiba ajanga samaba oshi 639 lir ta ashir aser ano tang ya asenoki asentenshia asen tetsü oshi ya asen kidang aser kima yimdong nung sapua mejembira, taruba alima 22 buba tatemlen ka tashi nungbo alima nung Ao oshia samatsü, kechiyong iba mapangji alima nung azü nungi jakzükba Aotsür Aorbo alitsü saka Ao oshi jembir malitsü, anungji Ao kin dena samatsü. Ibaji asenoki kanga shisabolua bilemstsüla aser asen Ao oshi samatsübaji kanga apayua bilema mesamadaktsütsüsa tang yongi ano asentenshir Ao oshi jembir tenzüksüla. Iba tebilemba aser nükjidongji ataloktsü atema asenok taintemi asenok tsütsü atsünga masü saka tanurtem aser lanurtem tsütsü atsünga bilema inyaktsü kanga nungdaker. Asenok taintemi aiben tanü süngdong tilaka atemba ya asen taküm lia lensüka agitsü asoshi dang bilemba ama, asenoki asen Ao oshi mesamadaktsütsü asoshi jembiba aser inyakba mapatem ya asenoki asenok taintem asoshi inyaker amai bilemer, anungji Ao oshi mesamadaktsüi wazüka ayutsü nungdakba indangbo jembir saka asenoki tanurtem den asen tetsü oshi agi masü saka tangar oshi agiang jembir. Iba amaji asenoki tanü putu nunga tanurtemi Ao ocep aser Ao oshi nung züluba kaketem alia azüngtsü amai bilemer, ajisüaka tanü putu ya balaka, asenoki tanur tilatem parnok azüngtsü angazükli nungi kaket azüngtsü yimya mesüpadaktsüra, parnoki taküm nung kaket malitsü aser agütsüyonga bener arua mazüngtsü, kechiyong asenoki aginü maginü ta masü, ibai kaket masü saka screen nung azüngba putu lir. Iba putu yimya ya meteta asenoki tanurtem nem kechisa angazükdaktsüner aser metetdaktsüner, itemji kaket nung masü saka internet ajanga parnok computer aser mobile screen nung repranga züngtetsüsa asenoki parnok ayongsemer inyaktsüla, kechiyong asüng atema tetsü oshi angazüka jembitsü, azüngtsü aser zülutsüpurtemji tanü tanur aser lanurtemji lir. Iba denji ano pei tetsü oshi angazüksüba tesem tajungtibaji, tsürabur o tanurtem na külemi mapa inyakdak tesemji asütsü. Tanü asenok taintem aika pei tetsü oshi angazükba ya kaketreju nung masü saka pei tsüraburtem den külemi mapa inyakba mapang parnok den nungdak jembia mapa inyakba ajanga memeteti pei tsüraburtemi jembiba oshi angazükba lir. Aji oda, tanübo asenok aika tsürabur o tanurtem na külemi tesem ka nung mapa inyaktsüsa maongka mangur, iba jagi tanurtem pei tetsü oshi angazükdak maka akümer. Ibaji kodang bilemdangdir, tanü tanurtemi pei tetsü oshi mejembibaji parnok aitsütsüla masü saka asenok tsüraburtemi mesayuba ajanga lir. Aji oda, tanü putu nungbo tsüraburtem o tanurtem na pei kidang külemi alitsüa mapang tatsüka dang lir, kechiyong tanurtem tila asü dang anepdang nungi nikongdang tashi Ao mejembiba school nung alir aser class temaba tonger külenbo ano pei tsürabur ki toktsür tangaleni tazüngi aoer aser tangalen nungi züngzükler arudangbo joko kibong kümadoker, anungji tanurtem aika pei tsürabur kidang masü saka kaketreju aser kima yimdong nung medemer aser tesayurtem nungi angazükba oshiang jembir. Ibaji asenok tsüraburtemi kanga süoki ia bilemstsüla aser akok tashi mapang tatsüka tanurtem den kidang külemi alitsü mapang angudang, kidang kibong nung tanurtem den sensaksem akatsüla, külemi soruchioka chiyongtsüla aser kokra külemi Laishiba zünga sarasadem mapang agitsüla. Ibaji dang masü saka tanurtem anir alu aser farm-i aotsüla aser külemi alu mapatemji inyaktsüla. Alu melira, ki anasa atsü anepalua külemi inyaktsüla aser khenkenbo aremia külemi aotsüla. Item tesem nungji item mapatem inyakdang tanurtem den sensaksem akabangiang, ano tarutsü putu nung asen tetsü oshi mesamatsü asoshi tanü tanurtem dangji asen Ao oshi sayur asütsü.

OLEMSABANG

AO OSHI DANGI MEYIPDI

~ I. Anungba Sanglir

(*ABAM Tetsü Oshi Anogomung nung Unity Ao Baptist Arogo nung jembiba*).

Tetenzük nung O liasü aser O Tsüngrem den liasü, aser Oji Tsüngrem liasü. 2.Tetenzükdang pa Tsüngrem den liasü.3.Kechisarena pa ajanga adok, aser kechisa yangluogo, pa medenibo kecha meyanglu. 4.Pa dak taküm liasü, aser takümüji meimchir tesangwa liasü. Yohan 1:1-4.

Alima nung tetsü oshi anogo ya tanübo kin aikati metsüngareta amunger. Iba ya Bangladesh ajanga tenzük. East Pakistan aser West Pakistan ta aliba mapang ka nung oshioobenlen nungi anüdok aser anülulen aliba Pakistan nungertem tsüngda nung mangatetep adok, idangji anüdoklentip nung alir Pakistan nungertem kar tepset, tanübo par kin dang Bangladesh ta ajar. February 21, anogo ya parnok asürtem bilemteta Dakha yimtiba nung nüburtemi kanga metsüngareta amunger, aser yamaji alima kin aikati tetsü oshi anogo ta ibaji agizüka munga arudagi. Tanüa asen Ao kin tetsü oshi anogo den sendaktepa '**Ao oshi dangi meyipdi**' ta asüba omen nung ajemdaker iba anogo ya amunger. Oshioben ya kin ka ayak aser iba ya Tsüngrem nungi anguba sempet tulutiba rongnung ka lir. Meimchir asoshi sobusolemstü jagia kin kidongji jangjar, saka sobusolemstü dang nungibo oshi jagiang kin ka maitsü ayakji tejangjaba meteter aser sayur, anungji meimchir ka asoshi tetsü oshiobenji kanga dang tongtibang.

Kechiba asen kini '**Ao oshi dangi miyipdi ta jembitsü rateter?**' Ya kanga sashia shisadangtsü onük ka masü no? Mapang ka nung kanga sentsüpranga aliba Ao kin oshioben mera taket, kensümensü tanganütsü aketba oshiobenji tanübo ramiramia kümdagi, anungji asenoki tang nungi danga Ao oshiji jangjajangjaa jangrajangraa mejembira aser mezülura mapang tatsüka tsüngda nung samaa aoba oshi dang ka akümütsü.

Tanü ni asen Ao oshiji asemstü kuma lemsar jembiner.

* Mezüngbuba nung: Jungliyimti nung alidang Aortemi jembiba o kar yangi yamai lemsateper. Pur medemsor tapak-tapurtem dang mezüngbo **KAN KÜMULUNG** ta jatempa liasü.

Menüshishi nunga tetsürtemi **ISAKSAKSAK** ta menü, aser teburtemi **SEMSEMSEMSEM** ta menüba otsü, otsüla-oboula nungertemi onok dang shia aru. Aser iba tesem nung asen tetsü-teboutem alidang keno jembishinü, jayajako aika jateta aoba; tetsü dang Oja ta ajar koba tetezü lar tanur Oshioben sayua O ajak jateta anitetba agi **OJA** ta aja. Oba tetezü; par chir Oshioben ajak O pateta mesüteta aniba agi **OBA** ta aja. Anük tetezü; ajaki toktsür oaka tesü tatemsa tashi nüka aliba agi, **ANÜK** ta aja. Anük indang O khu abener dang **OKU** ta aja. Anungji Ao kin nungjakoja ajak tetezü tajung aketba narokatem lir. Yamaji Olong ka dang süaka nungja asem pezü tetezü balala aketba o ka tatishi nung **OCHI, SHITAKBA, ADANGJI**, aser **ZÜNGPONG** yamaji O ka nung dang asüyonga telemsa balala tsüraburi jembia aru. Iba jagi sayur Ao oshi ya kanga dang takar oshi ka liasü. Jungliyimti ya asen **Aortem asoshi mezüng yimsoshiba** tesem aser mapang liasü.

* Tanabuba nung: Asen kin **SOYIM, AONGLENDEN, UNGMA** tonga arur liyonga aotsü tenzükbaji **Ao kin asoshi yimsoshiba tanabubaji** lir. Yangnungjagi ken o jembishinüba aser kentenmenü libaliru, sobaliba aika tajungtiba kuma metsüngareta amshia jembia lia aru. Tongtibangsa züluzüpong meliaka **otsü ka den ken ka melira otsüji mabensa** ta jembia. Anungji ken ka o ka ta asen tetsüteboutemi jembia aru. Tanüasüng otsü zülüoka ayuba ama ken ya liasü. Anungji Ao kin jagi O jembiba dang masü saka ken atenbajia sakuku maparen ajak nung amshia aru.

* Küm aika sülen kodang American Missionary asen Ao kin Naga lima dangi arua tamangba yimsü den külemi kaket shisatsü agütsü, iba den zülutsü aser jembitsü sayu, ibaji asen **Ao kin atema yimsoshiba tasembubaji tenzük**. Dr. Clark-i pa dang Ao oshi sayutsü asoshi Edijungba aser Süponglenba tena shimteta taa agütsür pa dang Ao oshi sayudaktsü. Par asem oshioben sayutsü metenzükdang mashileper Clark-iang tena dang olaosü adokdang kechi koma bangkilatsü aser temeli arakzüksü tebang nungi asü tenilen nungi tango sashitsü item indangji kar sayurang tenati jembishinüba otemji angazükuyonga aoba otsütem lir.

(*Maneni asüng adok nung...*)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Odisha nung tainlonglong ka densema Khristan asem tepset



February 16, 2026 nü Odisha state kübok Nialijharan yim dak tepsetba Khristan asem atema sarasademtsüba sentong nung tangokba noksa nung angur.

February 22, 2026: Odisha state nung tribal nisungtemi Khristan kibong ka nung tainlonglong ka densema züngsem asem tepset, ta osang ka ajanga metetdaksü.

Arrshi küm 35 Jitendra Soren, pa kinüngtsü Malati Soren (32) aser jala Sasmita (15) nung January 25 nü kinüngertemi tepsetba sülen February 16 nü asür asem atema tatembangbuba sarasadem sentong ka agiogo.

January 25 nü Keonjhar district kübok Nialijharan yim dak tribal yimsü amanger kinüngertemi Khristan kibong ka nungi züngsem asemji tepsetba

ajanga tanur asembo lajar kümogo.

Soren'er kibongi Khristan yimsü agizükba ajanga kinüngertem shirangteper, ta parnokki Soren'er kibong nem tai tonglokja liasü, ta kibong züngsem kati metetdaksü.

Khristan asem tepsetertem rongnung Jitendra Soren tedi, Baidyanath Soren aser par jabaso Sudam Soren aser Jitendra Soren teno Laxman Soren nung densema liasü.

Malati aser Jitendra Soren nati tanur asem toktsür pilaogo; arrshi küm 21 jala Pana Soren bo la kinüngbu den mile 60 shi pilar alir, jabaso Suguda Soren

(18) Bhubaneswar nung hostel nung lia azünger aser jala tanutsüla Rani Soren (12) lar tsürabur den telidak liasü.

"Police aser osangbenertemibo, Khristan asem tepsetbaji ali nungi mangatettep adokba ajanga lir ta ashir, ajisiuka tongti kulijobo ozü kibongi Khristan yimsü agizükba agi lir," ta Soren'er jabaso Suguda Soren-i metetdaksü.

January 25 nü Bharatiya Nyaya Sanhita (BNS) 2023 kübok Ghasipura police station nung ken o ka benokba sülen melung melemi alir nisung asem puogo.

Jala tantsüla Pana Soren aser

talakla Rani Soren nabo jenteta liasü.

Ita 8 tejaklen Jitendra Soren-i Khristan yimsü agizüka liasü. Pa mapang talangka shiranga aruba mapang nung par medemer kati pa nem pastor ka indang phone number agütsüba sülen pastor-i pa atema sarasademja liasü.

Pastor jagi, "Ni pa atema sarasademtsüba sülen pa temang tajungba aküm," ta ashi.

Iba mapang nungjagi tenzüka Soren'er kibong züngsemtemi hopta shia Tenla kidangi ao aser pa shirang anepadok.

State yimtiba Bhubaneswar nung Khristan lenir ka, Anil Kumar Nayak-i, Jitendra Soren temesen kanga mejungi raksar liasü, saka par kibong tamang ajanga pa shirang anep aser tanela jenjanga tajungba aküm, ta ashi.

Jitendra Soren tedi Badiya Soren-i pa shirang anepbaji metet, aser Khristan yimsü agizükba atema par kibong amokmerena liasü.

Suguda-i, "Onoki Khristan yimsü agizükba sülen mapang shia kübu-tambui ozü tsüraburtem den raratepa liasü," ta metetdaksü.

Badiya Soren'er jala shirang tenzüka sülen kinüngertemi, ibaji Jitendra Soren'er kibongi Khristan yimsü agizükba agi lir, ta tai tonglokja liasü.

January 25, 2026 nikongdang

5:00 ako meta Jitendra Soren'er kibong Tenla kidang nungi meyipa arur kidang anisüngzükba mapang nung Badiya Soren'er jala temang tamajungba akümba. Iba mapang nungji tebutambu den par jabaso na arua Soren den pa kinüngtsü aser jala tepset.

Osangbenertem den jembidang Suguda Soren-i, "Ali dak sendakba nung kinüngertem tsüngda mangatettepbo liasü, ajisiuka parnokki kodanga ozü kibong anema meinyak. Tang ozü kibong anema inyakba ya onoki Khristan yimsü agizükba agi lir," ta metetdaksü.

Suguda Soren-isa, "Onoki Khristan yimsü kodanga metoktsütsü. Onok Khristan ama alitsü aser asüdanga Khristan asütsü," ta metetdaksü.

February 9 nü Suguda Soren-i Keonjhar nung aliba Superintendent of Police dang iba ken o bushisüngdangtsü atema jurila agency ka nem agüjang, ta mepishiogo.

Suguda-i, "Khristan lenirtemi ozü kibong nung yimjung alitsü asoshi sarasadem sentong ka ayongzükba agitsü mepishia liasü," ta metetdaksü.

Ajioda February 16 nü Jitendra Soren'er kidang nisung 400 shi adenshia sarasadem sentong ka agiogo aser police-ia Khristantem nem security agüja liasü.

Unison Free Will Baptist Church tentetla, Martha Green süogo



Martha Green

Green-i lar Arogo nung küm 40 dak tali sayutsüngia aruogo aser New Haven area nungbo pastor küm talangtiba inyaklaji la liasü.

Green ya 1923 küm April 5 nü Greenville, North Carolina nung aso aser 1953 küm la kinüngbu Willie den külemi New Haven-i oa ali.

La mezüngbo Yale New Haven Hospital nung inyak aser Veterans Administration hospital nunga inyak. 1953 küm la New Haven nung aliba Pitts Chapel nung züngsem ka aküm aser 1963 küm mezüng iba Arogo nungji sayutsüngia liasü. Iba sülen küm 10 lir lai Unison Free Will Baptist Church tenteta liasü.

Hamden, Connecticut nung aliba Revival Arogo nung pastor, Danny Bland-i, "Green ministry kübok kütsü kümzüka liasü aser ni küm 8 asüdangyongi sayutsüngi tenzüksü atema lai kü nem maongka agüja liasü. Mapang shia lai kü dang kü taküm nung tajaba nenshia metetdakja liasü. Kü tanela jenjang ainba nung lai tongti shilem agi," ta metetdaksü.

"Koba mapang nungsa sayutsüngitsü atema lai ni jaokdir ni ao. Ita aika tejaklen lar Arogo nung sayutsüngitsü atema ni maongka ngua liasü. Kü taküm leniba aser kü ministry leniba atema ni yimjak nung la nem akhüm agütsür," ta metetdaksü.

la aja," ta metetdaksü.

"La takümji tamang, sarasadem aser Kibubar yimli tenzüka kuli ka liasü. La asüba atema onoki mangyimer, ajisiuka lai taküm junga aliba atema onoki benjungteper aser lai sayuba tatishitsü ajanga putu aika ajungmesotsü. Iba ama mangyimba mapang nung Green'er kibong aser Arogo nung züngsemtem atema sarasademjang ta mepishir," ta pastor Bey-isa metetdaksü.

La nem tetushi agüja 2019 küm November ita nung New Haven nung aliba Shelton Avenue aser Ivy Street ji "Pastor Martha V. Green Corner," ta nungja jalokja liasü.

February 22, 2026: New Haven, Connecticut nung aliba Unison Free Will Baptist Arogo tentetla, Martha Green alima nungi pilogo; la arrshi küm 102 liasü.

1973 küm Martha V. Green-i iba Arogo tenteta liasü. Lai tetsür pastor tem danga la tsüngsü nung jajatsü ajungmesoa liasü.

Unison Free Will Baptist Church nung tang pastor teinyakdak, Gershom Bey-i February 16 nü Facebook ajanga, "Tenyar Green alima nung la wadang tembangba sülen February 14, 2026 nü anisüngzükogo, la indang chichiba Valentine, asen Kibubai iba anogo (Valentine's Day) nung

ANO GO ABEN TSÜNGREM DEN

NE AIN ADOKBA MANUNG ANÜ TELUDAKTSÜ

"Ain Adoka temenen tebeshi. Ne ain adokba manung anü teludaktsü"

~ Efesa 4:26

Chuba Manassehi mapa tamajung aikasa inyak. Laishiba nung pa dang ya ain adoksang chuba ta-a ajar. 2Chubatem 21:16 nungji, Manassehi Yirusalem nung, kecha tai malirtem nisung jenti tepset aser item kuliji kodang bushidir, laishirtemi kuli agütsübaji pai pa sasa ainabong makokba ajanga nisungtemji tepset. Alima nung Tsüngremibo asenok nem pei sempet yari asenok temaba nung ajungketsür saka aiben asen taküm nung asen yimya ka asen sasa mazüoktetba ajanga asen sasa tamakok ajurur. Kanga dang tongtibang kaji "pei sasa azüoktsüba" ya lir. Aikadi iba ya zübazüba dang beshiba ajanga, pei taküm tajung aika pei sasa lendong, timtem, tamakok ajurur. Asen taküm nung anepdang saker memejang tashi nung asen sasa mazüoktetba ajanga ain adokba kwiben asen sasa khen arokaroka shisadangdi. Tsüngrem o jagi indangindanga ashir, "Ain Adoka temenen tebeshi. Ne ain adokba manung anü teludaktsü" Efesa 4:26.

Asenok ajagi iba Tsüngrem o ya sarasadema bilemdangtsüla...Na ner ki telungtet nung koma alir? Ner chirnurtemi pei kidangi arunüseta arur asü masü? Ano ner tsüraburtemi na ajurunüa ali asü masü? Office aser mapa balala nung Koma? Asen ain adokba jagi külem inyaker tejenshidaktsü. Atangji ain adokba nung tazüokba lidi.

SARASADEM:

Temeim Tsüngrem, iba temenen tera nungi onok teti pila-a alitsü asoshi Ne tanela temeshi tashi agüjangma. Amen

AO OSHI ANGAZÜKDAK:

TANÜ ANGAZÜKTSÜBA OJANG



Tzùshirong
 (n) kilong nung tzùshi metonga ayudak (a place where water bamboo vessels are kept in house)
 * Kidang tzùshirong ya soruchiokdak anasa mesemteta ayur.

Tzùsü
 (n) mepet alileni alu senzüba tangola (fog)
 * Tsüngsang majungba mapang mepet tzùsü agi lenmang nung timtem ajurur.

OLONG PAITEP # 7423


	1	2		3	4	5
6					7	
			8	9		
		10				
11						
			12			
13	14		15			16
17					18	

TIPIEN	LANGTSÜNGLEN
1. Inyaker ajangtetba	- (3) 1. Meshidak
3. Bangsemo adokdak	- (5) 2. Tanaben soshir
6. Shitak mesüi inyak	- (7) 3. Iba anogo
7. Ya mimong nung angur	- (3) 4. Meshi
9. Reprangzük	- (4) 5. Yagi mi tsükloker
10. Tasola	- (5) 6. Shi tapu ka
11. S _ _ _ _	- (4) 8. Yagi ayimer saka ozü masü
13. Yagi ajak ashioktsür	- (3) 9. Ajokba shiruru ka
15. Ki aokba oset	- (7) 12. Inyaktet
17. Ak shi nung inokba tasen	- (5) 14. _ _ _ hi
18. Ishika	- (3) 16. Akümüli nungi pilar

OLONG PAITEP # 7422 TELANGZÜBA

TIPIEN :	LANGTSÜNGLEN :
2. Asangwa, 4. Pasa, 6. Temopu,	1. Manga, 3. Apong, 5. Angu,
7. Sayu, 8. Sang, 9. Ibai, 10. Juli,	6. Techira, 8. Shiotep, 12. Jara,
12. Temeja, 13. Aisü, 14. Pongsen.	13. Lemsä.

NAI-A YA METETTER



Marathi superstar Prasad Prabhakar Oak-i Dharamveer movie nung shilem kanga junga agiba ajanga awards 15 tashi nguteta world record ka yangluogo. Iba atema January 14, 2026 nü Global Book of Excellence, England ajanga "highest number of awards by an actor for a single Marathi film" kuli agütsüogo.

Tripura nung mezüngbuba state games ayonga asayar



Agartala, February 22, 2026

(Agencies): Tripura Olympic Association (TOA)-i tang mezüng atema State Games ayongzuka amunger.

Tripura ya sporting hub tongtipang ka akümtsü sentong lir ta Chief Minister Manik Saha-i metetdaksüogo.

"Linük yangerba aser public health atema saisapong ya kanga tongtipang lir. Centre-i Fit India Movement ajanga anema alitsü maparen inyaker aser nütüng yongsük anema aliba ajanga linük jenjang tajungba akümtsü" ta CM

Saha-i ashi.

"Saisapong ya asenok asoshi kanga tongtipang lir. Prime Minister Narendra Modi ajanga national fitness mangdang ayuba sülen Tripura-i anidaker" ta paisa ashi.

Tripura nung saisaponger peria dang lir saka tesüiba nung saisaponger aikati inyakyim shitak lateta maliba ajanga masayatet aruogo ta CM Saha-isa ashi.

"Tesüiba nung Tripura nung saisapongertem tanga state tem tenüng nung bendangleni ao.

Saka tangbo Tripura Olympic Association tentetba ajanga parnok asoshi lenmang tasen ka lapokogo" ta pai ashi.

Sorkari sports development asoshi senotsü teyari agütsütsü aser state government schemes kübok saisaponger nem tajangzük agütsür, ta paisa metetdaksü.

"Tarutsü nung Tripura nungi saisaponger aika adoktsü aser parnoki mapa tajung inyaksü. State Games ya Tripura asoshi sporting chapter tasen ka tenzükba lir" ta CM Saha-isa ashi

Agartala-Dhaka-Kolkata bus service tenzüktsü

Agartala, February 22, 2026

(Agencies): Küm ka tema anendaka ayuba sülen Agartala, Dhaka aser Kolkata sendaktepa international bus service tenzüktsü.

Iba ajanga Tripura, Bangladesh aser West Bengal tsüngda tesentaktep asentenshia lapoktsü.

Iba bus service ya Tripura Road Transport Corporation (TRTC) aser Royal Maitree

ajanga ketdangsia aru saka visa services sota ayuba aser passenger kanga maliba ajanga mesenzüteti aküm.

Iba bus service ya visas magütsüba ajanga mesenzüi liasü aser iba ajanga passengers senzusenbong mesüteti aruogo ta passenger guide Sipon Sarkar-i ashi.

"Küm ka tema service anena liasü saka yashi onoki test run atema bus bener aru" ta pai ashi.

"Bus service senzütsü ta asüba atema pelar. Tang atema onoki trial trip agir aser kobi melii passengers senzütsü imlar" ta bus driver Fayeg Ahmood-i ashi.

Bangladesh High Commission nung ketdangsurtemi kaketshirtem, tourist aser tangartem asoshi visa maparen inyaksü aser iba ajanga cross?border travel tenzüktsü ta Ahmood-isa ashi.

Golaghat kübok Negeribil nung alir nem eviction notice agütsü

Guwahati, February 22, 2026

(Agencies): Assam Forest Department-i Golaghat district nung kibong 59 nem eviction notices agütsüogo.

Supreme Court nungi tetuyuba ka anguba sülen Forest Department-i Merapani nung No. 2 Negeribil nung alir nem eviction notices agütsü.

Golaghat Forest Division ajanga agütsüba notice nung anogo tenet tsüngda ali toktsür aotsü tetuyuba agütsüogo.

Iba mapa ya Forest

Department, Central Reserve Police Force (CRPF), aser district police ajanga inyaker.

Sarupathar nung Uriamghat aser Merapani nung No. 2 Negeribil kübok eviction drives agia aoba sülen ano department-i forest land nungi alirtem meindoker.

Iba ken o ya August 8, 2025 nung adoka liasü. Iba mapang Forest Department-i No. 2 Negeribil nung alir kibong 205 nem eviction notices agüja liasü.

Iba atema Negeribil nungi kibong 59 aser Uriamghat nungi kibong 11-i Gauhati High Court nung temepishiba ken o ka benok.

Tatem nung iba ken o Supreme Court tashi atong aser February 10 nü Assam Forest Department pusema oshidang ka agütsü.

Iba tesem nung alir aikati fresh notices agizüktsü memulung mesüra sign masü saka ketdangsurtemi parnok kidang notices maloktsüogo. .



Pakke Kessang district kübok Seijosa nung Arunachal Pradesh-Assam arrtsü mezüngbuba official border pillar enokdang agiba noksa ka angur. Iba ajanga Namsai Declaration tangatetba sayur ta Arunachal Pradesh Chief Minister Pema Khandu-i metetdaksüogo.

Afghanistan-i Pakistan nem telangzüba tapet agütsütsü nangzük



Tawa takum bendanga agütsür Pakistan nung bomb pokloksüba sülen Islamabad-i Afghanistan nung amak ta ashir. Pakistan-i Honibar aonung Afghanistan tesem balala nung tayimtsü amshia amak, kong tetsür aser tanur densema nisung 18 tepset ta Taliban-i ashir.

Kabul, Tsüklai/February 22 (Agencies): Pakistan indang military-i Deobar anepdang anung ajanga Afghanistan kübok tesem balala makogo. Pakistan-i ashiba agi, parnoki tawa linük nung tesem balala amakba kiralongrar teloktem indang teseptem maka liasü.

Pakistan indang Ministry of Information and Broadcasting-i Deobarnü X ajanga ashiba agi, itangitertem osang dak ajemdaker linük military-i Pakistan Taliban, shirnok dang TTP ta ajar parnok indang teseptem den TTP den sendaktepba aliba teloktem amendaka aliba tesemtem makogo.

Khorasan Province nung amendaka aliba ISIL (ISIS) den sendaktepa aliba telok shirnoki iba ita tetenzüklen Pakistan yimtiba amakba nangzükogo, parnok amendaka aliba tesem dena makogo, ta ministry-isa shisem.

Pakistan ministry yagi ashiba agi, tawa Islamabad den northwestern Bajaur aser Bannu district tem amakba indang kuli tejangja nguteta lir aser item tesemtem ya Afghanistan nung amendaker aliba lenir aser handler tem tetuyuba nung maka liasü.

Kasa mapang nung Afghan Ministry of Defence-i item tesemtem amakba aitsüogo. Pakistan-i amakba mapang arrtsü nung aliba Nangarhar aser Paktika province tem nung tamangba yimsü sayuba riju ka aser nisung aliba kitem raksatsü, aser iba ajanga tanur aser tetsür aika densema nisung aika asüba den aika yirua liasü.

Defence Ministry-i iba inyakyim ya aitsüogo aser ashiba agi, iba ya international temzüng ozüng alema lir. Parnokisa telangzüba tapet agütsütsü tenangzükba agütsüogo.

"Nüburtem aliba tesem aser tamangba yimsü dak sendakba

tesemtem dak rangloker jenjang agiba atema onoki Pakistan military dak tai tongloksür. Onoki mapang tapet nung telangzüba tapet agütsütsü," ta kasa sangdong ajangsa metetdaksü.

Bihsud district kübok Nangarhar district nung Pakistan-i anung ajanga amakba tesem nungi osang agütsüba mapang Al Jazeera osangbener Naser Shadid-i ashiba agi nisung 17 asüba jangjaogo aser nisung trok samar bushidar, shirnok ki chireper aliba nung sabanger alitsü ta tsübua bilemer.

"Iba tesem nung tamangba yimsü sayuba riju ka dena kongshio, ta Afghanistan nung ketdangsurtemi metetdaksü, aser iba tesem nunga nisung karbo süogo saka mejangja," ta pai ashi.

Paktika nung nisung asüba indang osangbo kecha agüja mali.

Item tesemtem amakba ajanga kidanger linük ana tsüngda ceasefire benoker aliba raksatsü amokmerener. Taoba küm October ita linük ana tsüngda raratepba sepai aser civilian tem aika tepsetba sülen ceasefire ya benoka liasü.

Pakistan-i ashiba agi, parnoki Afghanistan Taliba sorkar dang parnok amaktsü atema telok balala nem Afghanistan litsü ya tamendakdak ama mamshidaktsütsü mepeshio, saka Kabul-i jenjang tapet agia mali.

Pakistan-i iba tesem yimjung nung dang toktsütsü teti meranga arur, saka Pakistan nungertem kümzüka toktsütsüji ajak dang tongtibangtiba lir, ta kasa sangdong ajanga ashi.

"Item inyakyimtem ya itangitertem osang dak ajemdaker Afghanistan nung TTP aser parnok den sendaktepa alirtem tamendakdak anema benoka

inyakba operation tem lir ta Pakistan-i nenshir. Parnoki Afghanistan nung ketdangsurtem nem aiben tekümdangtsü metetdaksüogo," ta Al Jazeera osangbener Kamal Hyder-i ashi.

Northwestern Khyber Pakhtunkhwa province nung pei temang nung bomb alenoker pokdaksür kati Bannu district nung security convoy ka maka sepai ana aser lieutenant colonel ka tepsetba sülen ghonda ishika lir Pakistan-i anung ajanga Afghanistan maka liasü.

Hombarnü pei tema nung bomb aneloker pokdaksür kati gari ka nung bomb enoka bener oa Bajaur anasa security post ka indang jara nung oa tsüka bomb ya pokdaksüba sülen sepai 11 aser tanur ka tepseta liasü. Iba sülen mapang tatsüka lir ketdangsurtemi ashiba agi nisungba ya Afghanistan nung liasü.

February 6 nü ano tangar kati Islamabad kübok Tarlai Kalan tesem nung amendaker Khadija Tul Kubra mosque nung nüburtem sarasadema aliba mapang pai bona aliba bomb pokdakja tekülemer 31 tepset aser 170 yiruja liasü.

Islamabad nung iba mosque amakba ya ISKP puri nangzüka liasü.

Khadija Tul Kubra ya ita asem tsüngda tanga agi tanabenbuba maka liasü. Iba lendong atalokba sülen iba tesem amaktsü atema tasa asaba aser training agiba ajunga ya Afghanistan nung ataloka liasü, ta Pakistan military-i ashi.

Deobarnü sangdong ka ajanga Pakistani Information Ministry-i, Doha nung nangzüktepba ama Taliban-i inyaktsü atema parnok nongshitsü atema alima kintem ayongzükogo. Iba jenjang agiba ya parnok aliba temeket aser alima nung yimjung atema kanga tongtibang liasü, ta ministry-isa shisem.

Russia-i Moscow nung aliba airports ajunga shibang

Moscow, Tsüklai/February 22 (Agencies): Russia yimtiba nung tenük yoker drone amshia amakba mechi jelia tekümdangtsü mera agia Deobarnü Moscow nung aliba airport ajunga shibang, ta Russian state broadcaster RT ajanga ashi.

Mapang tatsüka lir Russia indang aviation regulator Rosaviatsia-ia air defence system activate süa alinung security mechi yimti nung tayimtsü tenokdangba agütsü ta ashi. Moscow leni arua aliba drones tenet khazüka yok, ta Mayor Sergei Sobyenin-i ashi. Iba lendong nung asüamaba mesüra ki o jen raksaba osangbo mali.

Moscow nung tongtipang airports pezü - Sheremetyevo, Domodedovo, Vnukovo aser Zhukovsky - lir aser linük yimtiba nung domestic aser international traffic timba item yagi ketdang asür. Ketdangsur temi khen atema shibangba ya airport kobasar mashi, saka yimti nung aliba airports pezü

shibang ta osang kar ajanga ashir.

Udmurtia region nung ballistic missiles yangluba tesem ka amak ta Kyiv-i shir anogo ka lir tang Ukraine nungi item drones ya yoka liasü.

Ukraine indang General Staff-i ashiba agi par sepaitemi Ukraine anüdoklen kilometer 1,400 shi pilar Votkinsk nung short-range Iskander aser intercontinental Topol-M densema missiles yangluba tesem amak. Iba mapang parnoki par linük nung yangluba Flamingo cruise missiles amshi aser iba tesem nung mi adoka liasü ta parnoki ashi.

Udmurtia governor Alexander Brechalov-ia iba tesem Honibar aonung amak aser ki o jen raksatsüba aser nisung yiruba lir ta ashi. Izhevsk aser anasa region tem nung aliba airports tem khen asoshi operations anena lir, ta Rosaviatsia-i ashi.

Votkinsk nung alirtemia ola tulu adoka apokba aser drone senzüba ola angashi ta ashir.

Onoki US matsüngdang mapudaktsü: Iran Tir Pezeshkian

Tehran, Tsüklai/February 22 (Agencies): Tehran indang nuclear sentong nung tezüngzüktep ka yangludaktsütsü mechi tesem kar amaktsü asadangtar ta US Tir Donald Trump-i ashiba sülen Iran Tir Masoud Pezeshkian-i United States matsüngdang mapudaktsü nangzük.

Gulf nung tensa mejungi akumba mapang ka nung Pezeshkian-i Honibarnü iba o ya jembia liasü, kong US sepaitem maneni timba kuma aircraft carriers ana den jets aika yoka lir.

"Item timtem mapang onoki mapudaktsü," ta Iranian Paralympics team züngsemtem tushiba sentong ka nung Pezeshkian-i ashi.

"Alima nung tashi tulu aliba linüktem tasü mait külemi nokdaker asen tekolak anguma ludaktsütsü meranger. Timtem mapang nenoki mapudakba ama asenoki item teblemstü nung mapudaktsü," ta pai ashi.

Ita tetenzüklen Oman nung Iran aser US tsüngta Tehran nuclear sentong indang jembishinü tenzükshi aser taoba hopta Switzerland nung senden tanabuba mena liasü.

Washington aser Tehran-i jembishinü junga liogo ta ashir, ajisüaka parnoki telemtetba tajung ka magitet.

Yimtenren tsütsü tangatetep kati arutsü asenoki tonga lir mesük, ta Iranian Foreign Minister Abbas Araghchi-i Hokulbarnü ashi aser Washington dangi yoktsü asoshi anogo ana nungi asem tsüngta draft deal ka renemtsü sentong lir ta ashi.

Iran aser US ya taoba küm nungi nuclear ken o jembia aru, saka Israel-i iba linük nung maka anogo 12 rara tenzükba mechi iba jembishinü anen. US iba rara nung densema Fordow, Natanz aser Isfahan nung Iranian

nuclear sites asem nung bomb pokloksüba liasü.

Iran-i sorkar anema longkak aiter pua merenshiba sülen January ita nunga Trump-i mitkar tashi amshitsü amokmeren tasen agüja liasü. Iba amokmeren langzüa Tehran-i region nung US military bases amaktsü amokmeren aser parnoki Strait of Hormuz shibangtsü tekümdangtsü asgi, koba Gulf Arab linüktem nungi alima tesem balalai toztü belenba atema tongtipang tzü lenmang ka lir.

US media ajanga ashiba agi, tang region nung Washington airpower ya 2003 küm Iraq amakba sülen tesashitiba lir. Tesüiba anogo ishika tsüngta Washington-i Middle East nung tayimtsü 120 dak tema yoka lir aser alima nung aircraft carrier tulutiba USS Gerald R Ford ya lenmang nung lir. Arabian Sea nung USS Abraham Lincoln carrier strike group lir.

Iran-i Hokulbarnü United Nations Security Council dangi shiti ka yokba nung US mitkar tashi ulushiba ya yimya ka ama mezüngshitsüla ta ashi.

Iran-i mepetmesü mesüra raratsü meranger masü aser rara metenzüktsü, ajisüaka US-i tashiyim amshiba nung tapet telangzüba agütsütsü, ta shiti nung ashi.

Brehostibarnü Trump-i pa indang Board of Peace senden tenzükdang, tezüngzüktep tajung ka meyaglura langka tamajung ataloktsü ta ashiba sülen iba shiti ya Iran-i zülua liasü.

Iba anogo Air Force One nungi jembidang, Iran asoshi anogo 10-15 shi lir, ta Trump-i shia liasü.

Region nung rara tenzüktsü tetsübo nung Sweden, Serbia, Poland aser Australia densema linük aikati pei nübur dang Iran nungi ainshitsü ajungshir.

T20 World Cup: England-i run 51 agi Sri Lanka akok



England-i run 51 agi Sri Lanka koker pelatepba noksa angur

Tsüklai/February 22, 2026

(Agencies): Tang asaya aliba T20I World Cup nung Deobarnü Super 8s phase nung mezüngbuba asaya nung England nung bowler temi kanga junga asayaba sülen Harry Brook-i aniba team yagi run 51 agi co-hosts Sri Lanka kokogo.

Mezüng batting amenba sülen England team-i temulung süa masayateti over 20 nung asayar 9 out ser run 146 dang yangluteta liasü, saka asaya tanabubva shilem nung bowler temi kanga junga asaya-a parnoki Sri Lanka team nem run 95 dang yangludaktsü.

Jofra Archer-i tongtibang batter Pathum Nissanka aser külem opener Kamil Mishara

out sütsü, saka ajak dang jangrademtsü taketibaji all-rounder Will Jacks-i powerplay madem tsüngda wicket asem agiba ya liasü.

Jacks, shiba iba asayamung nung asayar kar nungbo ball junga monteti aruogo, pai Kusal Mendis aser Pavan Rathnayake na atonga out sütsü aser iba sülen Dunith Wellalage out süja Sri Lanka pur mapang ka nungbo asayar 5 out ser run 34 dang yanglur liasü.

Kamindu Mendis Liam Dawson-i catch out sütsüba den Dushan Hemantha pasasa stump nung züka out asüba sülen Jacks aser Tom Banton na senteper boundary nung ball ka kanga junga ajepzüka Sri

Lanka captain Dasun Shanaka out sütsü, shiba run 30 yanglua liasü.

Batting amenba mapang England nung batter temi junga masayatet aser parnok rongnungi Jos Buttler-i ball 14 nung run tenet dang yangluba den Jacob Bethell-a kanga kara out süatok aser Tom Banton-a pasasa run out asü.

Phil Salt-i run 62 aser Jacks-ia run 21 yangluba ajanga team jenjang tera junga küma liasü.

England team Super 8s nung Pakistan den Mongolbarnü aser New Zealand den Hokolbarnü asayatsü lir.

Super 8s phase nung asaya ana kokra parnok semi-final-i kechi südir süaka aitsü.

1st Northeast Indigenous Games atema NWA team Manipur-i iogo



NWA ketdangsür aser wrestler tem Imphal atongba sülen tangokba noksa nung angur.

Kohima, Tsüklai/February 22 (TYO): All Manipur United Clubs Organization (AMUCO)-i jaokba sülen Nagaland Wrestling Association (NWA) team nung züngsem ti, Ibuba Northeast Indigenous Games nung shilem agitsü atema Imphal tongaogo.

Iba asayamung ya All Manipur United Clubs Organization aser Manipur Students Federation (MSF) tawabangba kübok February 23 nungi 25 tashi asayatsü.

NWA Team-i Naga Wrestling asaya-a sayutsü aser iba asaya nung shilema agitsü, kong

Manipur aser tanga state tem nungi asayartem aikati Naga Wrestling nung Nagaland team den longjemmer shilem agitsü imlar.

NWA Joint Secretary, Kuzhovesa Soho-i sangdong ka ajanga ashiba agi, kidanger state ana tsüngda tesendaktep tajungba küma yanglushitsü aser Nagaland adena or Naga Wrestling asaya ajungkettsü nükjidong nung iba asayamung nung shilem agir.

Temetetsü kaji Naga Wrestling ya National medal event ka ama agizükogo aser iba asaya ya mezüngbuba taküm January

12 nungi 14 tashi Goa nung asaya liasü.

NWA Team nung tir Vivolie Kezo Team Director, Property Secretary Team Manager aser Seyielhoukho Sech? Referee ama densema lir. Asayartem rongnung S?thitoRhakho (96 Kg), Khr?kuzo Nyekha (90 Kg), Kedosie Nagi (85 Kg), Seyiezhatuo Sano (70 Kg) nung densema lir aser Pitsali Sangtam-i (Driver) parnok anirogo.

NWA Office-i wrestling asayar meimer ajak dang asayartem nongita yaritsü asoshi mepeshia metetdaktüsügo.

Cristiano Ronaldo-i otsü tasen ka yangluogo

Tsüklai/February 22, 2026

(Agencies): Nüngtugu football asaya Cristiano Ronaldo ya arishi küm 30 ajungba sülen goal 500 idaktsüba mezüngbuba football asayar kümogo. February 22 nü Saudi Pro League nung Al-Nassr puri goal 4-0 agi Al-Hazem akokba asaya nung pai goal ana idakja iba otsü tasen yanglua liasü.

Ronaldo pa indang career nung goal 1000 ajungtsü anasabai odar. Deobarnü goal ana idaktsüba densema pai goal 964 idaktsür lir aser iba alizüng tasen atongtsü asoshi goal 36 dang nüngdaker. Pai goal 963buba idaktsüba ya 2015 küm arishi küm 30 ajungba sülen goal 500buba idaktsüba liasü.

Taoba mapang England nung football asayar Ronnie Rooke-ia arishi küm 30 ajungba sülen goal 493 idakja liasü. Pa arishi küm 49 tashi asaya aser pai pa indang career nung asaya 1,030 nung goal 934 idakja liasü.

Brazil nung nungtugu asayar Romario-ia arishi küm 30 ajungba sülen goal 450 idaktsü. Pa asaya nungi anisüngzüker aliba meyipa arur America Football Club nung asaya, saka ano 2024 küm

asaya nungi anenogo.

"Maneni asayatsü temela masü saka ni tejangrba mesamai lir. Ni tejangraba tulu lir aser maneni asayaner. Ni Middle East nung süang Europe nung süang kong asayadirr asayaka aji tongtibang masü. Ni teti football jangradema asayar aser maneni asayaner," ta Ronaldo-i December ita ashi.

Deobarnü asaya nung Ronaldo-i minute 13buba nung par team atema mezüngbuba goal idakja parnok tejakdang toktsü. January transfer window nung club-i jenjang tapet magiba anema pai league asaya ana aser AFC Cup asaya ka nung masayai liasü.

France nung asayar Kingsley Coman-i agütsüba ball ka Ronaldo-i penalty box nung kanga junga agizüka goal idakja liasü.

Iba goal ya offside atema VAR asadanga sülen shitak ta nguteta goal agütsü, koba Ronaldo atema arishi küm 30 ajungba sülen goal 500buba idaktsüba liasü.

Iba sülen Coman-i tanabuba goal idaktsü. Asaya mezüngbuba shilem madem tsüngda Ronaldo-isa goal ka idaktsü saka offside liasü.

Mayweather asaya nungi anisüngzüker aliba asayashi tenzüktsü

Tsüklai/February 22, 2026

(Agencies): Taoba mapang world champion Floyd Mayweather-i pa asaya nungi anisüngzüker aliba meyipa arur taküm küm tatemlen asayatsü ta shiogo. Pa tang agi pezübenbuba asaya nungi anener aliba meyipa arur asayatsü lir.

Arishiküm 48 tain asaya, shiba tatemsa 2017 küm asaya nungi anisüngzüka liasü pa taküm taoba mapang undisputed world heavyweight champions Mike Tyson den exhibition asaya ka asayatsü lir.

Ajisüka Mayweather-i pa iba asaya sülen küm teku lir tang mezüngbuba professional boxing-i meyipa aruru asayatsü ta shiogo.

Pa professional asaya shiba den asayatsü aji tang tashi sangdonga mali. 2017 küm mixed martial arts asayar Conor McGregor round 10buba nung technical knockout sütsüba sülen pa tang mezüngbuba professional asaya ka asayatsü lir.

Mayweather asaya aliba mapang pai weight class pongu nung title benogo, aser McGregor akokba ya pa indang professional asaya 50buba khen

danga tamakok mongui akokba liasü.

"Boxing asaya nung record tali yanglutsü atema kü dak tanga tashi lir," ta Mayweather-i ashi.

Pa shiba den koba anogo mesüra kong asayatsü iba indang osang tejangia tang tashi agüja mali.

Paisa, "ni Mike Tyson den asayatsü aser iba sülen professional asaya asayatsü lir. Shingai ni ama asaya shia nungi sen timtiba maazükettsü," ta ashi.

Mayweather 2007 küm (anaben) aser 2015 küm asaya nungi anen aser iba sülen ano 2017 küm McGregor akoba sülen asaya nungi anizüngzüka liasü. Pa professional asaya masaya-aka exhibition asaya ishika nung asayaogo aser tesüsa 2024 küm August ita John Gotti III den asaya liasü.

Pa indang career nung pai sen timtiba aazükba asaya asem nung asayaogo. Pa eight-weight world champion Manny Pacquiao, Mexican pound-for-pound great Saul 'Canelo' Alvarez, aser McGregor nung den asayaba mapang sen aika aazüka liasü.

BILEMDANGANG

"Tesüba tatalokbatem agi na talenbangdaktsü."